

SEMASA

Bekas Panglima ATM Tan Sri Mohd Sany Meninggal Dunia

Sabtu, 22 Ogos 2015 7:49 PM



Yang di-Pertuan Agong, Tuanku Abdul Halim Mu'adzam Shah berkenan menunaikan solat jenazah bekas Panglima Angkatan Tentera Jeneral Tan Sri Mohd Sany Abdul Ghaffar di Masjid Khalid Al Walid pada Sabtu. Turut hadir Panglima Angkatan Tentera Tan Sri Zulkifeli Mohd Zin (empat, kanan) dan Panglima Tentera Darat Jeneral Datuk Raja Mohamed Affandi Raja Mohamed Noor (tiga, kanan). Foto BERNAMA

KUALA LUMPUR: Bekas Panglima Angkatan Tentera Malaysia (ATM), Jen Tan Sri Mohd Sany Abdul Ghaffar, 86, meninggal dunia pada Sabtu di Institut Jantung Negara (IJN) akibat masalah jantung.

Panglima Angkatan Tentera, Jen Tan Sri Zulkifeli Mohd Zin berkata, Allahyarham menghembuskan nafas terakhir di IJN pada kira-kira pukul 2.20 petang.

Beliau berkata, arwah sebelum ini pernah dirawat di Hospital Tuanku Mizan Zainal Abidin, Wangsa Maju akibat masalah kulit sebelum dimasukkan ke IJN untuk rawatan jantung.

Zulkifeli menyifatkan pemergian arwah sebagai kehilangan besar buat negara kerana arwah merupakan perwira yang sangat jitu sepanjang memegang tampuk kepimpinan ATM.

"Saya berasa sedih di atas kehilangan arwah dan semoga Allah mencucuri rahmat ke atas rohnyanya di samping memohon agar arwah ditempatkan bersama para solihin yang lain.

"Saya juga berharap keluarga arwah tabah menghadapi dugaan ini," katanya kepada *Bernama* di Masjid Khalid al-Walid di sini, Sabtu.

Zulkifeli berkata, bukan sahaja ATM kehilangan seorang pahlawan yang banyak mencurahkan jasa kepada tentera, malah negara juga turut terkesan atas pemergian Allahyarham dalam menentukan kedaulatan dan keselamatan tanah air.

Seri Paduka Baginda Yang di-Pertuan Agong, Tuanku Abdul Halim Mu'adzam Shah turut berangkat menziarah jenazah Allahyarham di Masjid Khalid al-Walid pada pukul 4.41 petang.

Baginda turut menunaikan solat jenazah yang diadakan selepas solat asar bersama anggota warga ATM dan para jemaah lain di masjid berkenaan.

Sementara itu Panglima Tentera Darat, Jen Tan Sri Raja Mohamed Affandi Raja Mohamed Noor menganggap Allahyarham sebagai seorang ikon kerana merupakan antara pemimpin ATM yang membentuk ketumbukan ketenteraan negara yang mantap.

"Arwah merupakan seorang yang kuat pendirian selain mempunyai personaliti yang kukuh ketika menerajui ATM," katanya sambil menambah arwah sanggup mengeneipkan segala onak dan duri sepanjang memimpin ATM bagi menentang ancaman komunis.

Allahyarham mula berkhidmat pada 19 September 1949 dalam Rejimen Askar Melayu Diraja (RAMD) dan mula menerajui ATM mulai 1 Disember 1977 hingga bersara pada 19 Januari 1981.

Mohd Sany dilahirkan pada 19 Jan 1929 di Selayang, Selangor. Beliau meninggalkan isteri Puan Sri Normah Mahmud dan lima orang anak.

Jenazah Allahyarham dikebumikan di Pusara Rejimen Askar Melayu Diraja, Port Dickson, Negeri Sembilan.

Tags/Kata Kunci:

[Mohd Sany Abdul Ghaffar](#)